

Kertie ba āncemmo



Kertĩε ba ãncemma

CELEBRATION SANS PRÊTRE EN CERMA

Première édition

Première Impression

Quatrième trimestre 2017

**Une traduction et adaptation du livre:
"Célébration sans prêtre"**

faite par SOULAMA Emmanuel SIL / CERMA,

BP 360 Banfora, Burkina Faso

Tél: 70277622/ 78091528

Baŋ ceŋ mensi-i duma

(Da kuɔ mɔmpɛryɛ si dii)

1. Domma

† *I tigiin i-naa, Tuono baa Biɛno baa Yalle-Sãnti yerre-na*

➤ *Ma ciɛ*

2. Jaaluŋgu

1^{er} Diilono waa baa-na!

➤ *Aa bi waa baa nuono-i.*

3. Yiingu fangu nelma muoyamma-i

(Nelma famma tigiin a saa baa naŋ ka kalaŋ mamaŋ yiingu fangu-na. Manamma yaa daama:)

Tobiŋ namaa, i tigiin nyugo-i-na diɛ cãrã Itieno-i ŋaa in ceŋ-man koko duma jumaansi ba yinni-na.

Yesu-Kirsa kuu aa sire nyungo ku temma yaa nuɔ-i a kor-e. A ce dumaŋo-na, terni-na hiere baa nilɛiŋa-na hiere, Diilon-dũŋ-baamba naana nyungo ku yiingu-i a hã Diilono. Jumaansi-i yibuɔ; aa yiingu fangu-i Itieno kũngu. Yesu-Kirsaŋ kuu aa sire gbɛrɛ-siremman, a kor-e ãmbabalma nammu-na baa kuliingu bi nammu-na. Gbɛrɛ faŋo yaa ciɛ i tigiin i-naa diɛ tuɔlnu Diilono-i aa ce-yo kasi saa da-yo u hujarre maama-na, aa bi cãrã-yuɔ u duɔ ce-ye Yesu-Kirsa siremma wataaŋ miɛ terni-na hiere.

I bi taara i muonu-mɛi baa nuɔmba-i hiere ba suɔ wuɔ Yesu-Kirsa yaa kuraa nelbiliemba-i hiere.

Yaaŋ i yaŋ i ǎnjɔguɔma tĩena terduɔŋ-nu aa i kar i tũnni-i fafamma i nu Diiloŋ uŋ ka waŋ mamaŋ baa-ye. Diiloŋ-nelma dii ŋaa fitĩnuɔ; da ŋ cu ma huon-nu ŋ sa pira. Die nu-ma, aa wuɔ ma hũmelle-i i ka bie Yesu maama-i aa Diiloŋ-hujarre temma ka waa i hommu-na.

Diilo kǎyǎ-nei!

4. Jande cǎrǎmma

Die tie taara i To u nu i cǎrǎmma-i nyuŋgo ku jumaansi daayo-na, i saaya i hũu-ma wuɔ i maacemma saa fa aa i cǎrǎ-yuɔ wuɔ u ce-ye jande. Mafaŋ da ma ce, i ka gbǎa pie-yo baa huɔŋga diei, aa u nelma ka da muntĩenammu i hommu-na.

(Na gbonu na cira:)

*Mi tũnuŋ Diiloŋo maŋ Weimantieŋo - baa mi huraan namaaŋo-i wuɔ mi cie ǎmbabalma-i bɔi:
- mi jɔguɔŋ babalaa - aa waŋ babalaa - aa ce babalaa. - Mi cǎlǎa, mi cǎlǎa, mi cǎlǎa ninsoŋo. - Ku'i cie mi cǎrǎ Mariya-Sǎnti - baa dɔrɔpɔuɔrbiemba-i - baa Sǎntibaa-ba-i hiere - baa mi huraan namaaŋo-i - wuɔ na cǎrǎ Itieŋo-i Diiloŋo-i na hǎ-mi.*

5. Jande nalǎangu

6. Gbeliemaŋ-nalǎangu

7. Diilocārālle

(Ceiŋo jumaansi dīēlāŋo-na)

Yaaŋ i cārā Diiloŋo-i:

Diiloŋ nuɔ, Weimantien nuɔ, nuɔni maŋ dii gbula, kāyā-yiē i hūu ŋ maama-i hīŋ a haa i naŋga-i niē. Yaŋ nelnyulmu yu i hɔmmu-i naŋ temma-i, ku yaa ŋ nupālle siē ce gbāŋgbāŋ. Kāyā-yiē i baa tiē maar ŋ nuŋgu-i.

I cārā-kuɔ ŋ wulaa Itieŋo-i Yesu-Kirsa yerre-na. *Ma ciē!*

(Hāalīŋ-jumaansi)

Yaaŋ i cārā Dombɔi:

Dombɔi nuɔ, Itieŋ nuɔ, kāyā-yiē i āndanni-i baa i ciluɔ-i ni waa ŋaa na niŋ taaraŋ ni waa dumaa, aa i tiē yii baa ŋ nelle suurmaŋ-kūŋgu yaa-i bāaŋgu-i baa isuɔŋgu-i.

I cārā-kuɔ ŋ wulaa Itieŋo-i Yesu-Kirsa yerre-na. *Ma ciē!*

(Siēliŋ-jumaansi)

Yaaŋ i cārā Itieŋo-i:

Itieŋ nuɔ, Weimantien nuɔ, baa yaŋ ŋ bisālm̃ba yufelle hel hīemaŋ-bīmbīnni-na, ku yaa ba hɔmmu ka fē ba cu ŋ huɔŋ-nu.

I cārā-kuɔ ŋ wulaa Itieŋo-i Yesu-Kirsa yerre-na. *Ma ciē*

(Naalīŋ-jumaansi)

Yaaŋ i cārā Weimantieŋo-i:

Diiloŋ nuɔ, Weimantien nuɔ, ŋ fafaangu temma si dii. Kāyā-yiē i nanna hɔbabalanga-i ku yaa i ka gbāa tiē ce ŋ huɔŋga-i hɔnni maŋ joŋ.

I cārā-kuɔ ŋ wulaa Itieŋo-i Yesu-Kirsa yerre-na. *Ma ciē!*

8. Diilonj-nelma kalamma-i

(Neldielāmma hel Tobisīcōlōnniņ-sebe nuō. Umanj kalaanj duō u donj u cira:)

→ Mēl u sebe u huōya-maama yaa daama:

(Duō ji bāl, u cira:)

→ Diilonj-nelma yaa daama yaanj i jaal-o!

(Nuōmba siē:)

➤ *Diilonj nuō, Itienj nuō, i jaal-ni bōi!*

(Nalāangu)

(Na biē nalāangu manj kāan baa nelma manj banj kalaanj-ma, da ma'i sī na kalanj gbeliemanj-nalāangu manj dii Misel-na. Hāalīj-nelma hel Tobisīfelennīj-sebe nuō. Fuō bi donj aa perienj dīēlā-wuōņo temma yaa-i.)

❖ Evāsil jārāmma-i: **Aleluya**

❖ Evāsil kalamma-i: Diilonjō waa baa-na

➤ *Aa bi waa baa nuōņo-i*

→ Neldōdōlma yaa daama Mēlņo wamma-na:

➤ *Itie, nuō bōi!*

(Duō ji kalanj tī u cira:)

➤ Diilonj-nelma yaa daama yaanj i jaal-o!

Nuōmba siē: Diilonj nuō, Itienj nuō, i jaal-ni bōi!

9. Diilonj-nelma firnumma-i

(Diilonj-nel da ma kalanj tī, tayaana firnu-mēi baa nuōmba-i.)

10. Huɔyamaaŋo

📖 Mi hũyāa Diiloŋo-na, Tuoŋo maŋ gbāa ce bĩmbĩnni-i hiere.
Mi hũyāa Yesu-Kirsa-i-na umaŋ u beɗuɔla-i.
Yalle-Sānti diyaa-yo u nyu kusũngu-na,
Vierse Mariya huɔŋ-yo.
Ba huolaa u yaaŋga-i Põse-Pilati bāaŋgu-na.
Ba gbuu-yo kuraa-i-na u kuu.
Uŋ kuu, ba dii-yo cĩncorre-na.
Yesu hiirriye bikuomba-na.
U sieliŋ-yiingu-i u siire hel bikuomba-na.
U nyugāaŋ ka tĩena Diiloŋo nadien-na,
Tuoŋo maŋ gbāa ce bĩmbĩnni-i hiere.
U ji hel kusuɔŋ'nu-i a ji ger nuɔmba-i.
Cicēlmantaamba-i baa bikuomba-i hiere.
Mi hũyāa Yalle-Sānti-i-na,
Baa Egilisi katoliki-Sānti-i-na,
Mi hũyāa-ma wuɔ nelfafaamba kāyā ba-naa,
Wuɔ āmbabalma ka yaŋ,
Wuɔ bikuomba ka hel cĩncuɔŋa-na a da cicēlma maŋ siɛ
ji tĩ dede.

11. Diilocārälle

Tobiŋ namaa, yaaŋ i ce kuuduɔŋgu i cārā Diiloŋo-i i hā Diiloŋ-
dũŋ-baamba-i, baa i huraamba-i, baa i nellen-baamba-i hiere.

*(Na biɛ nalāaŋgu-i, nuɔmba naa da ma'i sī ba ndii da ba piiye, tayaana u bāl-ku
dumaa baa nel daama temma:)*

Diilonɔ nuɔ, i Tienɔ nuɔ, nuɔnei i To nuɔŋo-i. Ŋ yufellen hilaa ŋ bisãlmba maŋ nuɔ-i ŋ tigiin-ba terduɔŋ-nu, ba waanɔ ba kusũŋ-maama yaa-i baa-ni, migãan-ma ŋ hã-ba; ba haa ba nanɔga-i nuɔnei nuɔ-i yonɔ, firnu ŋ huɔŋga-i baa-ba.

I cãarã-nie Itienɔ-i Yesu yerre yaa nuɔ-i. *Ma cie!*

12. Niipãnninɔ-huɔŋgu

(Tayaana sire u nammu-i aa cira:)

Diilo, nuɔni maŋ bĩmbĩnni-i hiere ni Tienɔ nuɔ, i tuɔlnu-nie baa i hɔmmu-i hiere. Nuɔnei hielaa dɔrɔ-i baa hĩema-i, aa ma nelbilonɔ-i ŋ nabieraŋo a jĩna-yuɔ bĩmbĩnni-i hiere ni yuɔŋ-nu.

Nuɔnei hãa-ye fafalmu-i i tie fiisa, baa hĩhĩlma-i, baa niiwuoni-i a naara nimaŋ faanɔ i maama-i hiere. Ku'i cie i jo baa-ni die ji jaal-ni aa die pã-ni hã-ni.

(Nalãanɔgu)

13. Diilojaalunɔ:

➔ Yesu-Kirsanɔ kuu aa sire, yaanɔ i gbeliɔŋ i To-i aa i jaal-o ma yerrenɔ.

(Nuɔmba sire yiera hiere)

➔ Diilonɔ waa baa-na!

➤ *Aa bi waa baa nuɔŋo-i*

➔ Yaanɔ i firnu i hɔmmu-i

➤ *I vii Diilonɔ-i baa-mu*

➔ Yaanɔ i jaal Itienɔ-i Diilonɔ-i

➤ *Ku faa aa ku yaanɔga yaa dumaanɔ-na*

I To nuɔ, ɲ fafaangu temma sī, ɲ saaya baa jaalungu kelkel aa i tie gbɛliɛɲ-ni hɔnni-na hiere baa terni-na hiere. ɲ Biɛɲo ciɛ fafaangu saaya-niɛ ji cor.

(Nalāangu)

ɲ Yalle barguɔ-i-na, u juɔ Mariya ji hon-yo nelbilon temma, u ciɛ ɲ huɔɲga-i kan saaya ka ce duma. U siyaa muliɛɲ aa hūu-ma fara u nammu-i ba gbu-yo daangu-na a ko-yo nuɔmba yufelle-na aa sire yiera kuliɲgu maacemma-i. U ciɛ mafamma-i duɔ gbāa duɔ tigiɲ nuɔmba-i hā-ni.

(Nalāangu)

Ku'i ciɛ i ka naara dɔrpɔpuɔrbiemba-i baa ɲ baamba-i hiere a hāl nalāan daaku-i gbuuse-niɛ wuɔ:



- *Sānti oo Sānti oo Sānti Diilonɔ dūnya u Yuntienɔ ...*

- *Diilo nuɔ niman faa da welewele...*

14. Kura a tuɔlnumma-i

(Tayaana sire kura-i pigāan nuɔmba-i aa cira:)

➔ Kertīeyienɔ dānya u fɛɛ baa bige-i?

➤ *Baa kura*

➔ Yesu diyaa-ye Diilon-nellen-hūmelle-na baa bige-i?

➤ *Baa kura*

➔ I gbāa wan Diilonɔ yefafalle-i baa bige-i?

➤ *Baa kura*

Tobiŋ namaa, i hɔmmu fiɛ nyungo-i-na. I suyaa wuɔ jumaansibaa-ba-i hiere ba dii ŋaa Paki i wulaa. Yesu cie sũlma aa ku. Uŋ kuu, i To siire-yuɔ; uu dii tuɔ ce u b̃aangu-i u caangu-na. Nelma famma saaya ma fɛ i hɔmmu-i. I suyaa wuɔ die hũu Yesu maama-i aa haa i nanga-i yuɔ, iŋ ceŋ sũlma maŋ hĩema-na bande-i-na, die fiɛ ku, i ka sire ŋaa fuɔ uŋ siire dumaa a ka waa baa-yo tie ce i b̃aangu-i Diiloŋ-nelle-na.

➤ Kuraa nuɔ, Yesuŋ cie sũlma-i nuɔni maŋ dɔɔ-i, nuɔ bɔi.

(Na gb̃aa bi h̃al nal̃aangu maŋ k̃aŋ baa-ku.)

Diiloŋo hii, u yaa siire Yesu-i hiel-o kuomba hɔlma-na. Die haa i nanga-i yuɔ, aa hiel i nanga āmbabalma-na, mulĩema sie gb̃aa cu i hɔmmu-i, kuliingu sie bi gb̃aa cu i hɔmmu-i.

➤ Kuraa nuɔ, Yesuŋ cie sũlma-i nuɔni maŋ dɔɔ-i, nuɔ bɔi.

(Tayaana biɛ kura-a-i a b̃ɩnya nuɔmba-i baa-yo aa cira:)

† Yesu-Kirsa, nuɔni maŋ kuu kura-a-i-na, k̃ỹā-bei: Tuoŋo baa Biɛŋo baa Yalle-Sānti yerre-na. *Ma ce dumaa*

(Nal̃aangu:) Yesu siremmaŋ-nal̃aangu:

15. Jaalup̃angu

➤ Diiloŋ-Yalle cie i ce baaduɔŋ miɛ. Teriengu fangu-na, Yesuŋ h̃aal̃aỹā-yiɛ jaaluŋgu maŋ, yaan i biɛ-ku baa hɔf̃elle fiɛfiɛ-i-na:

➤ *I To nuɔ nimaŋ dii dɔɔ-i-na*

➔ Diilo, jande, kor-e āmbabalma-na hiere. Fẽ nyungo ku bāangu-i ŋ hā-ye. Yan aa ŋ kāyā-yiε. Ce hujarre yiε aa ŋ hūu-ye Bigāarāŋo nammu-na ku yaa i siε kusirre. Niŋ pāa nungu maŋ baa-ye i tīenaana kufangu tīenamma yaa-i tiε cie i Konkortieno-i Yesu-Kirsa jomma-i.

➤ *Wuo nuɔnei Itien nuɔ, nuɔnei Weimantien nuɔ, nuɔnei fafaangu tien nuɔ.*

➔ I Tien nuɔ, ŋ waan baa ŋ pɔpuɔrbiemba-i wuo: «Mi yaan hɔfɛlle-i hā-na, mi hāa-na baa mi hɔfɛlle-i,» baa fer mei āmbabalma-i, yan aa ŋ ne ŋ baambaŋ haa ba nanga-i niε dumaa! Yan ba hommu fẽ ŋaa niŋ taaraŋ-kuɔ dumaa. Tigiŋ-ba ba ce baaduɔmba ba baa ji bɔɔ dede.

I cārā-kuɔ ŋ wulaa Itieno-i Yesu-Kirsa yerre-na. *Ma ciε!*

➔ Itieno hɔfɛlle waa baa-na!

➤ *Aa bi waa baa nuɔŋo-i!*

➔ Tobin namaa, pāan na-naa Kirsa jaalungu-i

(Da ma'i sī)

➔ Tobin namaa, diyaan Kirsa hūmma-i na-naa nammu-na baa huɔŋga diei.

(Da kuɔ kominyɔ dii kporuo-i-na, tayaana kā ka hiel-o jo baa-yo. Huɔŋgu fangu-na, nuɔmba biε Diilon-Tūmbilongo nalāangu-i.)

📖 *Diilo Tūmbilon nuɔ halaŋ dūnya ānjalamma yiε oo aa ŋ ce hujarre yiε...*

(Nalāan da ku bāl, tayaana pigāan Yesu kūɔma-i aa cira:)

→ Diiloŋ-Tũmbiloŋo maŋ halaan nelbiliemba ãmbabalma-i u yaa daayo.

➤ *Yunŋtie, muɔmi saa saaya ŋ har-miɛ, yan aa ŋ wan nelma diei yon mi ka sire.*

(Tayaana duɔ cal kominyɔ-i tĩ, na tĩena celle aa na suɔ na dii na nunŋu ãntũnumma-na. Da kuɔ kominyɔ si dii duɔ cal, da na pã na-naa Kirsã jaaluŋgu-i tĩ, na gbãã cãrã Diiloŋo-i aa suɔ dii na nunŋu ãntũnumma-na.)

16. Periema-i

→ **Yaan i cãrã Diiloŋo-i:**

Diiloŋ nuɔ, Weimantien nuɔ, nuɔni maŋ dii gbula, kãyã-yiɛ i hũu ŋ maama-i aa haa i nanŋa-i niɛ. Yan ŋ nelnyulmu yu i hoŋmu-i.

Kãyã-yiɛ i tie gbã i ce ŋ huɔŋga-i fafamma ku yaa niŋ pãa nunŋu maŋ baa-ye, ku yiin da ku hi, i ka da-ku.

I cãrã-niɛ Itienŋo-i Yesu-Kirsã yerre-na. *Ma ciɛ!*

→ Diiloŋo waa baa-na

➤ *Aa bi waa baa nuɔŋo-i*

† Diiloŋo-i Weimantienŋo kãyã-yiɛ: **Tuonŋo baa Bienŋo baa Yalle-Sãnti yerre-na.**

➤ *Ma ce duma!*

→ **Biriin na kũŋ baa hoŋfẽlle-i Kirsã barguɔ-i-na**

➤ *I jaal Diiloŋo-i boi!*

Helman-nalãanŋu:

Bilojeiŋo maŋ duɔ tuɔ yii duɔ ku baŋ hãŋ-yoŋ batemu-i duma

Baa sigen bĩmbĩŋ daani-i: hũmma baa batemu to/nyu.

Da ŋ da hũmma maŋ bĩenya, ku faa. Ŋga da ŋ saa da, ŋ ce baa hũŋgbãŋgbãlãmma-i, ku sa bĩena bĩŋkũŋgu.

Domma

† I tigiŋ i-naa, Tuoŋo baa Biŋo baa Yalle-Sãnti yerre-na

➤ **Ma ciɛ**

(Aa ŋ jaal nuɔmba-i. Da ŋ jaal-ba tĩ ŋ cira:)

Tobiŋ namaa, yaaŋ i cãrã Diiloŋo-i i hã biloŋ daayo-i, u ka da batemu-i fiefie daayo-na. Aa i bi cãrã-yuɔ i hã u bĩncuɔmba-i baa u batemu to-i/nyu-i baa bamaŋ daa batemu-i cor hiere. Itienŋo-i Yesu-Kirsaŋ dɔlaa-ye, yaaŋ i cĩŋ u yaa nuɔ-i. Yaaŋ i har i weima-i hiere i hã u yaa-i.

Yaaŋ i cãrã Diiloŋo-i:

Diiloŋ-nuɔ, Itienŋ nuɔ, nuɔmba-i hiere ba jo hĩema-na naŋ jomma. Nuɔnei i To nuɔŋo-i, nuɔnei i weima-i hiere. Molon duɔ jo hĩema-na, naŋ taara u jo gbula; ŋ sa taara u bir. Batemu ce-ye nelfelaŋ miɛ i diɛ gbãa diɛ da cicẽlma maŋ sa tĩenŋ dede. Biloŋo maŋ ciɛŋ sũlma-i daayo-i, u mulãaŋ. Jande, hũu-yo Sitãni nyisẽnni-na ŋ dii-yo ŋ baamba horre-na. Hũŋ daama barguɔ-i-na, baa ŋ Yalle bi barguɔ-i-na, i taara diɛ haa u yerre-i M..... Jande, yaŋ u ce naŋ bilohoeŋo.

I cãrã-kuɔ ŋ wulaa ŋ Biŋo-i Yesu-Kirsa yerre-na. *Ma ciɛ*

In tĩenaana baa maman

In haa i nanga-i Yesu-Kirsa-i-na ku'i cie i tie taara i hã bilon daayo-i batemu-i. Mie man daa batemu-i tĩ, in haa i nanga-i kuman nuɔ-i aa sie batemu-i, juɔn i wan-ku i tĩnu u baamba-i:

“Mi hũyãa Diilonɔ-na ...”

(Yuu batemu to-i/nyu-i, baa bilonɔ bĩncuɔmba-i baa nel daama-i, da kuɔ kertĩebaa:)

➔ I To-i Diilonɔ-i Weimantienɔ-i, uman hielaa dɔrɔ-i baa hĩema-i, na haa na nanga yuɔ wei?

➤ *Ũu, i haa i nanga yuɔ!*

➔ U Beduɔla-i Itienɔ-i Yesu-Kirsa-i, Mariyan huɔn uman, u cie sũlma-i aa ku ba fuure-yuɔ, u sire hel kuomba holma-na a nyugũn ka tĩena i To caan-nu. Na hũyãa mafamma-i wei?

➤ *Ũu, i hũyãa-ma!*

➔ Diilonɔ-Yalle maama-i, Katoliki ba maama-i, Diilonɔ-baamba maama-i, jande maama-i, kuomba siremman-kũngu-i baa cicẽlma man sa tĩen dede ma maama-i, na hũyãa-ma wei?

➤ *Ũu, i hũyãa-ma!*

Mie i haa i nanga-i ma yaa nuɔ-i aa ce ba batisen-ye. Diilonɔ-dũn-baamba-i hiere ba bi haa ba nanga-i ma yaa nuɔ-i. In waan-ma baa-na nuɔmba yufelle-na de-i-na i hommu fĩe.

Batemu

Mɛl, mi batisen-ni: Tuonɔ baa Biɛnɔ baa Yalle-Sãnti yerre-na.

Ku huonɔgu-na, na ce: *I To nuɔni manɔ dii dɔrɔ-i-na ...*

Ŋ perienɔ baa Diilocārāl daade-i:

- | | |
|---|-------------------|
| ✓ Diilo dii fafalmu yuɔ | <i>Ma ce duma</i> |
| ✓ Diilo baa yan Sitāni da yungu yuɔ | <i>Ma ce duma</i> |
| ✓ Diilo ce-yo bilofɛfɛinɔ | <i>Ma ce duma</i> |
| ✓ Diilo ce-yo nelviinɔ | <i>Ma ce duma</i> |
| ✓ Diilo ce-yo nɛliɛnɔ | <i>Ma ce duma</i> |
| ✓ Diilo yan u huonɔga waa fuɔ hūmelle yaa nuɔ-i | <i>Ma ce duma</i> |
| ✓ Diilo yan u huonɔgu maar u yaanɔga-i | <i>Ma ce duma</i> |
| ✓ Diilo yan u nelle ce u diisuure. | <i>Ma ce duma</i> |

Bisālāaŋ fuuremma

Yaŋ bĩmbĩŋ daani maama tĩenu-niɛ ɲ biɛ-ni:

- Baŋ bĩɛnya hũmma maŋ
- Katesisi ba joŋgoruo saaya u waa ɲ nuoŋgu-na
- Kuraa saaya u kã fuuremmaŋ-teriɛŋgu-na

Aa suɔ da ɲ doŋ, ɲ misĩŋ hũmma-i kuloŋo-na

† I tigiĩŋ i-naa, Tuoŋo baa Biɛŋo baa Yalle-Sãnti yerre-na

➤ **Ma ciɛ**

M..., batemu maŋ diyaa-ye Diiloŋ-horre-na, hũŋ daama yaa ciɛŋ u maama tĩenu-yiɛ.

(Da kuɔ na ka kã baa-yo Diiloŋ-dũŋgu-na, na gbãa biɛ-yo ta. Da na ka ta na suur, na biɛ nalãaŋgu na ta na suur:)

(Da na suur tĩena tĩ, ɲ cira:)

Yaŋ i cãrã Diiloŋo-i:

Diiloŋ nuɔ, Weimantieŋ nuɔ, ɲ fafaangu temma sĩ, bisãlmba maŋ daa batemu-i, ɲ puurii ɲ nelle hũmelle-i hã-ba. I hũyãa-ma wuɔ ɲ nelma-i hiere ninsoŋo. *M.....* bi hũyãa-ma miɛ temma-i aa da batemu-i. Teriɛŋgu faŋgu-na, i cãrã-niɛ i nyu-i Maari barguo-i-na baa bamaŋ siire cãa-ni hiere ba yerre-na, wuɔ ɲ kãyã-yiɛ i gbãa tiɛ ce ɲ huɔŋga-i a gbãa diɛ ka da i-naa hiere ɲ nelle-na.

I cãrã-kuɔ ɲ wulaa ɲ Biɛŋo-i Yesu-Kirsa yerre-na. *Ma ciɛ*

Diilon̄-nelma kalamma

(Ce nuɔmba tĩena)

M.... daa batemu-i kuu dii ɲaa u daa Yesu cicēlma temma. Uɲ taɲ aa duɔ yaɲ-ye dɛ-i-na ku jaɲ-ye. Da ɲ saa jɔguɔɲ kã yaɲ-na ɲ da ɲ cira Diilon̄o gãaɲ baa-ni. ɲga ma diei dii mamaɲ fĩeɲ i hɔmmu-i; M.... waa horre-na baa Yesu-i, iɲ yeɲ terien̄gu maɲ nuɔ-i fiefie-i-na, uu dii tĩena baa-yo tĩ dii i To caaɲgu-na.

Diilon̄-babĩmuɔɲ hii bamaɲ, yaɲ i ne u nelmaɲ waɲ mamaɲ ba kũɲgu-na:

1. *Tesaloniketaamba sebe dīēlāɲo 4:13-18*

2. *Ɔrɔmutaamba sebe 8:31-39*

📖 Nalāaɲgu: *Ba yunni dɔlaa dɔrɔ-i-na*

Matie 9:18-19, 23-26

Nsãa 11: 5-10

Nsãa 11:28-37

Matie 18:1-5

Nsãa 11: 11-16

Nsãa 11:38-44

Nsãa 11:1-4

Nsãa 11:17-27

Nsãa 14:1-4

(ɲ hielnu Diilon̄-nelma-i gere)

Diilocārãlle

Mamaɲ kuɔɲ-yeɲ yaɲ i waɲ-ma baa Diilon̄o-i:

📖 *Bũɲ-ye bũɲ-ye Diilo bũɲ-ye oo*

1. Yaɲ i cārã Diilon̄o-i i hã M.... bĩncuɔmba-i baa bamaɲ taa ba kuye u maama-i hiere wuɔ Diilon̄o kãyã-bei huɔɲ daaku-na aa hur ba nyinyɔlma-i.

M... taa u jo yiingu-na hofēlle maŋ waa ba dumelle-na, Diilo, nuoni maŋ hofēllentien nuɔ, kāyā u bīncuomba-i ba hommu fē gbarnu.

2. Diiloŋo sa ce weima-i gbāngbāŋ, aa u sa bi ce-ma ku da ku col moloŋo. U baa yaŋ *M...* tamma seŋ i kūɔma-i. U yaŋ ma cēr dii sirɛiŋa yiɛ aa ce i migāaŋ naŋ kaasīnni u hūmelle-na.

3. A hā miɛ maŋ tigiin i-naa bande-i-na hiere diɛ ji saŋ *M...*, u yaŋ bisīŋ ku maama ta ma tīɛnu-yiɛ. Aa u kāyā-yiɛ i tiɛ nu u nuŋgu-i aa tiɛ ce u huɔŋga-i.

Diilo, nuoni maŋ kuuyen ŋ bisālm̄ba maama-i. Maman kuɔŋ-yen manamma yaa mafamma-i. Ne ŋ Biɛŋo-i aa ŋ ce-ma ŋ hā-ye. I cāarā-niɛ fuɔ yerre yaa nuɔ-i. *Ma ciɛ.*

📖 Jande nalāaŋgu:

Yaŋ i gbonu baa *M...* nabaamba maŋ taa u yaaŋga-na hiere i hāl nalāaŋ daaku-i i tuɔlnu Diiloŋo-i:

📖 Gbeliemaŋ-nalāaŋgu

Yesuŋ hāalāayā-yiɛ cārāmma maŋ i ka biɛ-ma:

I To nuoni maŋ dii dɔɔ-i-na...

(Da ba ta ba hāl nalāaŋgu faŋgu-i ŋ ta ŋ misīŋ hūmma-i kuloŋo-na. Da ba ji bāl, ŋ cārā Diiloŋo-i dumandɛ:)

Dombɔi nuɔ, i cārã-niɛ diɛ hã M... ɲ hielaa-yo kukulma-na a dii-yo cecerma-na. ɲ bĩɛ-yo ce-yo naɲ nolɲo aa ce u huɔŋga-i ɲ muntĩɛnammu. Kãyã miɛɲo-i i gbãa tĩɛ ɲ horre-na a ka gbãa da i-naa baa-yo ɲ nelle-na a waa baa i-naa gbula teriɲgu-na tiɛ ce i bāaɲgu-i.

I cārã-kuɔ ɲ wulaa ɲ Biɛɲo-i Yesu-Kirsa yerre-na. *Ma ciɛ.*

Fiɛfiɛ-i i gbãa biɛ M... a saɲ-yo kã baa-yo u dufɛliɲgu-na.

(N kām̃ma-na, nɛini gbãa ta ni hãl da ma'i sĩ sapele gbãa tuɔ ce. Da na ka hi, ɲ bĩnya cĩncorre-i dumandɛ:)

Da ɲ ma dufɛliɲgu-i, aa suɔ da ɲ suur-kuɔ ɲ bĩnya-kuɔ. M... dufɛliɲgu yaa daaku, u ka galla ku yaa nuɔ-i tuɔ cie u siremmaɲ-yiɲgu-i. I ka bĩnya-kuɔ aa suɔ dii-yo kuɔ.

Yaɲ i cārã Diiloɲo-i:

I To nuɔ, ɲ fafaɲgu temma sĩ, yaafɛlle-i hiere baa hoɛlle-i ni hel nuɔnɛi nuɔ-i. Fɛ cĩncor daade huɔŋga-i ɲ hã M..., aa duɔ suur galla, ɲ puɔr ba ji ta ba niya-yuɔ.

I cārã-kuɔ ɲ wulaa ɲ Biɛɲo-i Yesu-Kirsa yerre-na. *Ma ciɛ*

(Aa ɲ misĩɲ hũmma-i diɛ. Da kuɔ kuraa dii duɔ ful-diɛ, ɲ bi bĩnya ufaɲo-i dumandɛ:)

Diiloɲ nuɔ, kuraa daayo yaa pigãaɲ ɲ hũmelle sĩnni-i. I haa i nanga u yaa nuɔ-i aa cu ɲ huɔɲ-nu. Mi bĩnya-yuɔ baa naɲ yerre yaa-i aa i diɛ gbãa jĩna-yuɔ ɲ nolɲo yudɔrɔ-i-na.

(Aa ɲ misĩɲ hũmma-i yuɔ aa ɲ hã-ba hũmelle-i ba dii kuloɲo-i)

A batisenḡ jeinḡ maḡ taaraayan u hūmelle-i

Baa sigenḡ bĩmbĩḡ daani-i: hūmma baa batemu to/nyu.

Da ḡ da hūmma maḡ bĩenya ku faa, da ḡ saa da, ḡ ce baa hūḡgbāḡgbālāmma-i, ku sa bĩena bĩḡkūḡḡu.

Domma

† I tigiinḡ i-naa, Tuonḡ baa Biḡḡ baa Yalle-Sānti yerre-na

➤ **Ma ciḡ**

Tobiḡ namaa, M... hūyāa-ma duḡ suur baa-ye i horre-na Yesu hūmelle-na, i ka hā-yo batemu-i ḡaa maḡ ceḡ duma. Aa i suḡ die hi terienḡu fanḡu-i, i ka cārā Diilonḡ-i hā-yo, baa u dumellenḡ-baamba-i baa u batemu to-i/nyu-i baa Diilonḡ-dūḡ-baamba-i hiere. Yaḡ i firnu i hōmmu-i baa Diilonḡ-i.

(Yaḡ ku ce cēlle aa ḡ cira:)

Diilonḡ nuḡ, Itienḡ nuḡ, nelbiliemba-i hiere ba jo naḡ jomma. Nuḡnei Itienḡ nuḡḡo-i. Umanḡ duḡ jo, ḡ sa taara u kḡsuḡḡ; ḡ taara kutienḡ da cicēlma maḡ sa tīḡḡ dede-i. Batemu barguḡ-i-na, i ciḡ nuḡfelaḡ miḡ die gbāa die da cicēlma famma. Fieḡie-i-na, i cārā-niḡ: M... yaa daayo, hōllo suurii-yuḡ; u mulāḡ jarma-na. Baa yaḡ-yo jarma nyisēnni-na; hūu-yo u bigāarāḡ nammu-na ḡ dii-yo ḡ baamba horre-na u da yaafēlle aa ḡ ce u huḡḡa fē. Hūḡ daama barguḡ-i-na baa ḡ Yalle bi barguḡ-i-na, i taara die haa u yerre-i M..., yaḡ u suur ḡ bisālmba horre-na.

I cārā-niḡ ḡ Biḡḡ-i Yesu-Kirsa yerre-na. *Ma ciḡ*

In tĩenaana baa maman

I to (nyu) (hãaŋo)..... uŋ haa u nanŋa-i Diiloŋo-na ku'i cie i tie taara i hã-yo batemu-i. Mie maŋ daa batemu-i tĩ, in haa i nanŋa-i Diiloŋo-na maman nuo-i aa hũu batemu-i juoŋ i waŋ-ma:

Mi hũyãa Diiloŋo-na.....

(Da kuɔ jeiŋo nuŋgu nyaarãa ŋ yuu batemu to-/nyu yaa baa nel daama-i:)

→ I To-i Diiloŋo-i Weimantieŋo-i, umaŋ hielaa dɔɔ-i baa hĩema-i, ŋ haa na nanŋa-i yuo wei?

➤ *Ũu, mi haa mi nanŋa-i yuo!*

→ U Bɛduɔla-i Itieŋo-i Yesu-Kirsa-i, Umaŋ juo Mariya ji hoŋ-yo, u cie sũlma-i aa ku ba fuure-yuo, u sire hel kuomba hɔlma-na, a nyugũŋ ka tĩena i To caaŋ-nu. Ŋ hũyãa-ma wei?

➤ *Ũu, mi hũyãa-ma!*

→ Diiloŋ-Yalle maama-i, Katoliki ba maama-i, Diiloŋ-baamba maama-i, jande maama-i, kuomba siremmaŋ-kũŋgu-i baa cicẽlma maŋ sa tĩeŋ dede ma maama-i, ŋ hũyãa-ma wei?

➤ *Ũu, mi hũyãa-ma!*

Mie i haa i nanŋa-i ma yaa nuo-i aa ce ba batisen-ye. Diiloŋ-dũŋ-baamba-i hiere ba bi haa ba nanŋa-i ma yaa nuo-i. In waŋ-ma nuomba yufelle-na de-i-na i hommu fiẽ.

Batemu

M..., mi batisen-ni Tuono baa Biɛno baa Yalle-Sānti yerre-na.

Ku huongo-na, na ce: *I To nuɔni maŋ dii dɔɔ-i-na*

Ŋ perien baa Diilocārāl daade-i:

- | | |
|--|-------------------|
| ✓ Diilo dii fafalmu yuɔ | <i>Ma ce duma</i> |
| ✓ Diilo baa yaŋ Sitāni da yungu yuɔ | <i>Ma ce duma</i> |
| ✓ Diilo ce-yo nelfɛfɛiŋo | <i>Ma ce duma</i> |
| ✓ Diilo ce-yo nelviinɔ | <i>Ma ce duma</i> |
| ✓ Diilo yaŋ u huonga waa fuɔ hūmelle yaa nuɔ-i | <i>Ma ce duma</i> |
| ✓ Diilo yaŋ u nelle ce u diisuure. | <i>Ma ce duma</i> |

Ma diei dii, kutien duɔ gbuu tuɔ taara u hūmelle-i, ŋ baa sɛɛ; da ŋ hi, ŋ pāŋ hā-yo batemu dumandɛ: Mɛl, mi batisen-ni Tuono baa Biɛno baa Yalle-Sānti yerre-na.

A cārã Diiloŋo-i hã Diiloŋ-dũŋ-wuoŋo maŋ taaraayaŋ u hũmelle-i

† *I tigiŋ i-naa, Tuoŋo baa Biẽŋo baa Yalle-Sãnti yerre-na*

➤ *Ma ciẽ*

M...., i juo die ji cārã Diiloŋo-i hã-ni. Tigiŋ ŋ huoŋga-i aa i cārã-yuo u kãyã-yiẽ hoholmaŋ-huoŋ daaku-na.

Yaaŋ i cārã Diiloŋo-i:

Yesu, Itieŋ nuo, niŋ juo hĩẽma-na, ŋ wuoraaya bĩŋ terni-na hierẽ aa nuomba daa ŋ ãnfafamma-i ka saa. Kumaŋ taa ku yar nuomba-i cemma, naŋ taa ŋ ce-ku terduoŋgu-na. *M....* yaa daayo i nammu-na/dũŋgu-na, i taara ŋ ce kumaŋ yaraa nuomba-i cemma. Da ku u jufoeŋ-maama, weima si; ŋga da ku neliẽŋ-maacemma, guola-meĩ aa ŋ biẽŋo da u fere a sire ce u nabaamba temma-i. Uŋ fiẽ suur dũŋgu-na, baa yaŋ u kũoma seŋ baa ŋ hũmelle kũŋgu-i. Uŋ cālãa-ni baa mamaŋ hierẽ, yaŋ ma tĩ. Nuoni maŋ hujarre tieŋ nuo, dii fafalmu yuo aa ŋ fẽ u huoŋga-i huoŋ daaku-na.

I cārã-kuo ŋ wulaa ŋ Biẽŋo-i Yesu-Kirsa yerre-na. *Ma ciẽ.*

Mi tũnuŋ Diiloŋo-i ...

(Da ku u gbãa biẽ kominyo, ŋ ta ŋ biẽ nel daama-i; da ŋ waŋ mamaŋ, u waŋ-ma.)

- ♦ Itie, ŋ ciẽra wuo niwuofafanni maŋ hilaa doro-i-na ni yaa nuoŋo-i.
- ♦ Itie, ŋ waŋ-ma wuo umaŋ duo wuo niwuon daani-i kutieŋo ka da cicẽlma maŋ sa tĩeŋ dede.

- ♦ Itie, mi hũyãa η nelma-i ηga kãyã-miε mi hũu-ma hĩη.
- ♦ Itie, muɔmi saa saaya η har-miε, ηga yaη aa η waη nelma diei yoη mi ka sire.

Itieno-i Yesu u tuɔ niya-niε u cie Diilonη-nelle-i.
Ma ce dumaa.

Jeino nuη da ku doη, η waη nel daama-i η hã-yo:

- ♦ Itie, hũu-mi!
- ♦ Maari, i nyu nuɔ, nuɔ baa Yosefu-i cãarãη Diilonο-i na hã-mi.
- ♦ Yesu, Maari, Yosefu, taa na niya-miε.
- ♦ Yesu, Maari, Yosefu, bilaη-minη mi ku.
- ♦ Itie, min cãlãa-ni baa mamaη, ce-mi jande.
- ♦ Itie, kor-mi ãmbabalma-na.
- ♦ Itie, nin taaraη kumaη yaη ku ce. *Ma ce dumaa*

(Duɔ waa kertĩε aa Diilonο hũu-yo η yufelle-na η cãrã Diilonο-i dumande η hã-yo:)

- ♦ Dɔrɔpuɔrbien namaa, juɔη na ji biε M... na kã baa-yo Diilonο wulaa.
- ♦ Diilo, nuɔnei bĩε M...; jãrã-yuɔ η hã-yo muntĩenafafammu η caaηgu-na.
- ♦ Uη ηa naa fiε cãl-ni baa mamaη hiere, baa nyaanu-mei. Pie-yo η caaη-nu u waa yaafẽlle-na baa hoƒẽlle-na.

I haa i nanga niε aa tiε cãrã-niε η Biηno-i Yesu-Kirsa yerre-na. *Ma ciε.*

I ce “I To nuɔni maη dii dɔrɔ-i-na” a perien. I gbãa bi hãl nalãangu.

Yaacārāṅ-fuuremma

Yaṅ bĩmbĩṅ daani maama tĩenu-niē ṅ biē-ni:

- Baṅ bĩenya hũmma maṅ
- Katesisi ba joṅgoruo saaya u waa ṅ nuoṅgu-na
- Kura a maṅ ka jĩenaṅ cĩncorre-na u saaya u waa

(Aa suɔ da ṅ doṅ, ṅ misĩṅ hũmma-i kuloṅo-na)

† *I tigiṅ i-naa, Tuoṅo baa Biēṅo baa Yalle-Sānti yerre-na*

† *Ma ciē*

Mēl, batemu maṅ diyaa-ye Diiloṅ-horre-na, hũṅ daama yaa ciēṅ u maama ta ma tĩenu-yiē.

(Da kuɔ na ka kã baa-yo Diiloṅ-dũṅgu-na, na gbãa biē-yo ta. Da na ka ta na suur, na biē nalãaṅgu na ta na suur:)

(Da na suur tĩena tĩ, ṅ sire ṅ yiēra nuɔmba yaaṅga-na kuloṅo caaṅgu-na aa ṅ cira:)

Yaṅ i cārã Diiloṅo-i:

Yesu, Itiēṅ nuɔ, *M...* cālãa-ni baa mamaṅ hiere hĩēma-na bande-i-na, hiel-ma ṅ huɔṅga-na, ku yaa u ka gbãa da kuɔ baa-ni ṅ To caaṅgu-na a ji sire kuomba siremmaṅ-yiṅgu-na nyuguṅ dɔrɔ-i-na.

I cārã-kuɔ ṅ wulaa ṅ biēṅo-i Yesu-Kirsa yerre-na. *Ma ciē*

Diilon-nelma kalamma

Terni nanni yaa daani niman gbãa kalan kuliingu-na:

Like 2:25-31	Nsãa 11:28-37	1 Korẽntitaamba 15:51-57
Nsãa 11:1-4	Nsãa 11:38-44	2 Timote. 4:6-8
Nsãa 11:5-10	Nsãa 14:1-4	Ãmpigãmma 14:12-13
Nsãa 11:11-16	Nsãa 16:20-24	Ãmpigãmma 22:4-7
Nsãa 11:17-27	Orõmutaamba 8:31-39	

Ŋ hielnu Diilon-nelma-i gere yon

Diilocãrãlle:

Tobiŋ namaa, mamaŋ kuon-yen huon daaku-na, siiren i muo i natiẽa i To-i-na. Fuo si dii ŋaa mie; weima sa tugol-o. I baa sigen *M....* dumellen-baamba-i baa Diilon-dũŋ-baamba maŋ taa yaanga yuo hiere.

📖 Bũŋ-ye bũŋ-ye Diilo bũŋ-ye oo

1. Yaan i cãrã Diilono-i i hã *M....*, uŋ birii u huongu bamaŋ nuo-i hiere, Diilo nuoni maŋ hofellentien nuo, kãyã-bei huon daaku-na ŋ hur ba nyinyolma-i, aa ŋ hiel nelfafaamba bamaŋ ka gbãa cor baa manatienon taa aa nanna mamaŋ.
2. Diilono sa ce weima-i gbãngbãŋ, aa u sa bi ce-ma wuo u suu solaangu. U baa yan *M....* tamma sen i kũoma-i. U yan ma cer dii sireiŋa yie aa ce i migãan naŋ kaasinni u hũmelle-na.
3. A hã mie maŋ tigiin i-naa bande-i-na hiere die ji saan *M....*, u yan bisin ku maama ta ma tienu-yie. Aa u kãyã-yie i tie nu u nungu-i aa tie ce u huonga-i.

Diilo, nuɔni maŋ kuuyen ŋ bisāimba maama-i. Mamaŋ kuɔŋ-yen ma yaa mafamma-i. Ne ŋ Biɛŋo-i aa ŋ ce-ma ŋ hã-ye. I cārã-niɛ fuɔ yerre yaa nuɔ-i. *Ma ciɛ*

📖 *Nalāaŋgu:*

Yesuŋ hāalāayã-yiɛ baa cārãmma maŋ juɔŋ i gbonu i biɛ-ma:

📖 *I To nuɔni maŋ dii dɔɔ-i-na...*

(Da ba ta ba ce “I To nuɔni maŋ dii dɔɔ-i-na”, ŋ ta ŋ misĩŋ hūmma-i kuloŋo-na. Da ba ji bāl, ŋ cārã Diiloŋo-i dumandɛ:)

Itie, nuɔni maŋ sa tieraayan nelma ŋ huɔŋga-na, jande, i cārã-niɛ diɛ hã M.... U yaa kãaŋ daayo ŋ wulaa, kaalaa hūmelle-i aa u cor. Puɔr ba ji jārã-yuɔ kã baa-yo ŋ wulaa.

I cārã-niɛ ŋ Biɛŋo-i Yesu-Kirsa yerre-na. *Ma ciɛ.*

Fɛifiɛ-i i gbāa biɛ M.... a saan-yo kã baa-yo u dufeliɛŋgu-na.

(Kāmma-na, nɛini gbāa ta ni hāl da ma’i sī sapele gbāa tuɔ ce. Da na ka hi, ŋ bīnya cīncorre-i dumandɛ:)

Da ŋ ma dufeliɛŋgu-i, aa suɔ da ŋ suur-kuɔ ŋ bīnya-kuɔ. M.... dufeliɛŋgu yaa daaku, u ka galla ku yaa nuɔ-i tuɔ cie u siremmaŋ-yiingu-i. I ka bīnya-kuɔ aa u suɔ suur-kuɔ.

Yaan i cārã Diiloŋo-i:

I To nuɔ, ŋ fafaangu temma sī, yaafēlle-i hiere baa hɔfēlle-i ni hel nuɔnei nuɔ-i. Fē cīncor daade huɔŋga-i ŋ hã M..., aa duɔ suur galla, ŋ puɔr ba ji ta ba niya-yuɔ.

I cārã-kuɔ ŋ wulaa ŋ Biɛŋo-i Yesu-Kirsa yerre-na. *Ma ciɛ*

Aa η misĩη hũmma-i diε. Da kuɔ kuraa dii duɔ ful-diε, η bi bĩnya ufaŋo-i dumande:

Diilonη nuɔ, kuraa daayo yaa pigãaη η hũmelle sĩnni-i, miε i haa i naŋga u yaa nuɔ-i aa cu η huonη-nu. Mi bĩnya-yuɔ baa naη yerre yaa-i aa i diε gbãa jĩna-yuɔ η nolŋo yudɔrɔ-i-na.

Aa η misĩη hũmma-i yuɔ aa η cira:

Diilonη-nelma ciεra wuɔ: “I hilaa hĩεma-na, i ka bir suur hĩεma-na.” I ka dii M.... aa haa hĩεma-i yuɔ. Diilonŋo bi ciεra wuɔ: “Muɔmεi siireη bikuomba-i. Umaη duɔ haa u naŋga-i miε, duɔ fiε ku, u ka sire.” M.... naa hũu mafamma-i ku’i ciε u suur Diilonη-dũη-baamba horre-na. Ku’i bi diyaa sireiŋa miεŋo-na i saaη-yo saaη daama-i.

Yaaη i cãrã Diilonŋo-i:

Diilonη nuɔ, Weimantienη nuɔ, i saaη η cãarãŋo-i ji hi i muŋhimmu-i, jande, uη piεra ce kumaη niε aa ku saa fa, baa nyaanu-kuɔ. U ciε u kusaanunŋu-i hĩεma-na bande-i-na. Baa nanna-yuɔ, piε-yo η caaη-nu. U taa u ce horre baa η bisãlŋ miεŋo-i hĩεma-na bande-i-na. Uη ciε mulĩemma maη bande-i-na η huonŋu-na yaη u da ma sullu-i η wulaa.

I cãrã-kuɔ η wulaa η Biεŋo-i Yesu-Kirsa yerre-na. *Ma ciε.*

(Ŋ gbãa tiraa misĩη hũmma yuɔ aa ce ba dii-yo. Manamma sa tiraa ma ye dii cemma.)

Baṅ bĩnyaṅ dũṅgu-i duma

1. Nalãaṅgu:

Dommaṅ-ãndaṅgu

2. Diiloṅ-nelma: (*Like 6:46-49*)

⁴⁶«Bige-i ciε na ta na bĩ-mi Itie Itie, aa da mi waṅ mamaṅ baa-na, na siε ce-ma? ⁴⁷Umaṅ duɔ jo ji nu mi nelma-i aa ce-ma, mi ka pigãaṅ-na kutienṅ uṅ saa baa umaṅ: ⁴⁸U saa baa nelienṅ maṅ wuɔ u ma dũṅgu, aa hĩṅ ka hi tãmpẽlle-i jĩna ku tuole-i. Ku tuolenṅ jĩena fafamma aa u ma-ku, diiloṅṅ juɔ dãa bɔi, kanni gbar, hũmma bũṅ ka naṅ-ku, ma saa gbãa naara-kuɔ. ⁴⁹Ŋga umaṅ juɔṅ u nu mi nelma-i aa u sa ce-ma, u saa baa umaṅ wuɔ u ma dũṅgu aa u saa hĩṅ jĩna ku tuole-i aa ma-ku. Diiloṅṅ juɔ dãa, hũmma bũṅ ka naṅ-ku, ku pãṅ cii hiere, bĩṅkũṅgu saa tĩε.»

Diiloṅ-nelma yaa daama, yaṅ i jaal-o!

Diiloṅ nuɔ, Itienṅ nuɔ, i jaal-ni bɔi!

3. Ma hielnumma:

- ❖ Nelie nuɔṅo-i da ṅ fie waa nie nie, dũṅgu dii baa-ni. I weima-i hiere ma doṅ i dũnniṅ-hɔmmu'i nuɔ-i: i galla kusuɔṅ'nu-i, i fiisa kusuɔṅ'nu-i, i tigiinṅ i-naa kusuɔṅ'nu-i baa i bisãlmba-i, i saa dũṅgu-i kusuɔṅ'nu-i...
- ❖ Dũṅgu ãnfamma-i molo siε gbãa suɔ ma tĩ. Ba suɔ nelienṅo-i u dũṅhuɔṅga'i nuɔ-i...

- ❖ Dūnni dii baa-ye ninsoŋo, ŋga i dūnni si dii niiduɔnni. I sa bi tigiin-ni tigiiduɔma, i sa bi migāaŋ-ni migāaduɔma...
- ❖ Diilonɔ duɔ hã-ni dūngu, ŋ saaya ŋ hã u yaa ku tesĩnni-i u tuɔ niya-kuɔ baa bamaŋ dii ku huɔŋga-na hiere. Ŋga hɔnni bɔi dii, diɛ ce i kã ka hũu niihũuni a jo ji yu i dūnni-i wuɔ i ji tie niya i fɛɛ. Diilonɔ-dūŋ-baamba bɔi dii, da ŋ suur ba dūnni-na ŋ siɛ naa kuujĩnaŋgu... Namaa haa na naŋga-i Diilonɔ-na haan hama-i temma-i?... I saaya i hã Diilonɔ yaa muntĩenammu-i i dūnni-na. Duɔ da muntĩenammu, u yaa ka tuɔ niya-yiɛ i duɔfũmmu-na, i jarma-na, i yaahuolo-na, i hɔfɛlle-na; aa i gbãa tie tĩena baa-yo i saa i dūŋhuɔya-maama-i, Mamaŋ kuɔŋ-yen i gbãa tie waŋ-ma baa-yo, i gbãa bi tie jaal-o aa tie cãrã-yuɔ i caan-nu. Diilonɔ duɔ da muntĩenammu dūngu maŋ nuɔ-i, hĩhĩlma dii, hɔfɛlle dii, yaafɛlle dii, nelnyulmu dii, yentie sa waa dūngu faŋgu-na aa kutaamba sa taara bĩŋkũngu naa...

4. Diilojaale:

Tobiŋ namaa, i Tigiin diɛ ce Diilonɔ-i kasi saa da-yo dūŋ daaku maama-na. U yaa hãa *M...* baa u dūŋ-baamba-i fĩŋgũɔ-i u ma-ku. Da ŋ muo ŋ natiɛŋa molo-na aa u siɛ jo ji kãyã-niɛ, da ŋ saa jaal-o, ŋ siɛ gbãa tuora-yuɔ. Ku yaa ŋaa miɛ kũngu-i. Da ŋ fiɛ'a ŋ saa muo ŋ natiɛŋa yuɔ aa u suɔ-ma jo ji kãyã-niɛ, kufangu jaalungu saa saaya ku tĩ ŋ nuŋgu-na. Hai siɛ ce mafafamma-i hã u bigāarãŋo? Terienɔ faŋgu-na, Diilo, ŋ jaalungu bɔi; ŋ hãa *M....*dūngu ba da ba da muncĩmmu baa ba bisãlmba-i, i cãrã-niɛ wuɔ ŋ yaŋ ku cɔ ba

wulaa, bamaŋ ka ta ba galla-kuɔ hiere fẽ ba hommu-i aa ŋ hã-ba hĩhĩlma ku huɔŋga-na. Ta ŋ niya-kuɔ; baa yaŋ ba bigãarãmba hiel ba yufelle kuɔ.

I cãrã-kuɔ ŋ wulaa ŋ Biɛŋo-i Yesu-Kirsa yerre-na. *Ma ciɛ*

Katesisi duɔ piiye, nuɔmba siɛ-yo baa nel daama:

➤ I hãa-ni ku tesĩnni-i!

Katesisi maama yaa daama:

- ✓ Itie, niŋ hãa-ye dufeliɛŋgu maŋ ku yaa daaku.
- ✓ Bamaŋ ka waa-kuɔ, yaŋ ba ta ba kuye ŋ maama-i.
- ✓ Yaŋ ku waa ãnfafammaŋ-dũŋgu baa maacenciraŋ-dũŋgu.
- ✓ Yaŋ ku waa hɔfɛllen-dũŋgu baa yaafɛllen-dũŋgu.
- ✓ Yaŋ ba gbãŋ tigiin ba fere ŋ nelle suurma-na kuɔ.

Yaŋ i cãrã Diiloŋo-i:

Itie, ŋ ciɛ bien komorre baa cĩncieluo ŋ bĩncuɔmba holma-na aa suɔ da ŋ nyugũŋ kã ŋ Tohoiŋo wulaa. Dii fõŋgũɔ dũŋ daaku-na baa bamaŋ ka ta ba cɔ-kuɔ hiere. Ba kũɔŋ da ma fiɛ huol, da ba jo ji suur-kuɔ, ŋ yaŋ ba sire da yeryer. Yaŋ ba ta ba da-ni ba caaŋ-nu dũŋ daaku huɔŋga-na ba waŋ ba kusũŋ-maama-i baa-ni.

I cãrã-kuɔ ŋ wulaa ŋ Biɛŋo-i Yesu-Kirsa yerre-na. *Ma ciɛ*

Hūmisīrālle

Dūntaamba ta katesisi yaan-na u misīrrā hūmma-i dūngu
huonga-na baa ku huongu-na hiere.

5. Nalāangu:

Da ba ta ba misīrra hūmma-i, nuomba gbāa ta ba hāl
nalāan daaku-i wuɔ:

 *I tigiin nyungo-i diε ji gbelien Diilono...*

6. Diilocārālle:

- | | |
|--|--------------------|
| ✓ Diilo dii fōngūɔ dūn daaku-na | <i>Ma ce duma.</i> |
| ✓ Diilo yaan na da hīhīlma kuɔ | <i>Ma ce duma.</i> |
| ✓ Diilo fē na hōmmu-i kuɔ | <i>Ma ce duma.</i> |
| ✓ Diilo yaan na ta na duɔfūn fafamma kuɔ | <i>Ma ce duma.</i> |
| ✓ Diilo kāyā ku matieno-i | <i>Ma ce duma.</i> |
| ✓ Diilo yaan ku mulīema halaan-nei | <i>Ma ce duma.</i> |

Diilocārālle **Cucuiŋ-jaalungu**

† Tuonjo baa Biŋjo baa Yalle-Sānti yerre-na.

- ◆ Diilonŋ nuɔ, Itienŋ nuɔ, i ce-ni kasi saa da-ni cucuiŋ daaku-na. Nuɔnei maa-ye aa Itienjo yaa nuɔŋo-i. Niŋ hāa-mi duɔfūfafammu-i isuɔŋ daaku-na, mi jaal-ni bɔi. Kāyā-mie nyungo-i-na mi gbāŋ ce ŋ huɔŋga-i. Nuɔmba bɔi sa suɔ-ni; jande kāyā kutaamba-i ba suɔ-ni ŋ Biŋjo barguɔ-i-na aa wuɔ ŋ hūmelle-i.

Mi cārā-kuɔ ŋ wulaa; ŋ Biŋjo-i Itienjo-i Yesu-Kirsa yerre-na.

I To nuɔni maŋ dii dɔɔ-i-na

Ŋ yerre waa bɔi, Ŋ fāamaansīnni jo. Niŋ waanŋ mamaŋ ma ce hīema-na ŋaa maŋ ceŋ dumaa dɔɔ-i-na. Ta ŋ hā-ye baa i nuŋ juuru-i. Mie i ce jande bamaŋ cālāa-ye, ce-ye jande i cālmuɔ-i-na dumei. Baa yaŋ niitāalni mal-e. Kor-e āmbabalma-na.

Mi jaal-ni Mariya

Girasiya yuu-ni hiere. Diilonjo dii baa-ni. Diilonjo cie-ni dei a maar caamba-i hiere. Aa ŋ biŋjo-i Yesu u yerre dii bɔi. Mariya-Sānti, Diilonŋ nyu nuɔ. Cārā Diilonjo-i ŋ hā ānjalammantaanŋ mieŋo-i fiefie-i-na baa i kuliŋ-huɔŋgu-na.

Mi hũyãa Diiloŋo-na

Tuoŋo maŋ gbãa ce bĩmbĩnni-i hiere.

Mi hũyãa Yesu-Kirsa-i-na umaŋ u beɗuɔla-i.

Yalle-Sãnti diyaa-yo u nyu kusũngu-na,

Vierse Mariya u huɔŋ-yo.

Ba huolaa u yaanga-i Põse-Pilati bãangu-na.

Ba gbuu-yo kuraa-i-na u kuu.

Uŋ kuu, ba dii-yo cĩncorre-na.

Yesu hiiriyee bikuomba-na.

U sieliŋ-yiingu-na u siire hel bikuomba-na.

U nyugãaŋ ka tĩena Diiloŋo nadieŋ-na,

Tuoŋo maŋ gbãa ce bĩmbĩnni-i hiere.

U ji hel kusuɔŋ'nu-i a ji ger nuɔmba-i

Cicẽlmantaamba-i baa bikuomba-i.

Mi hũyãa Yalle-Sãnti-i-na,

Baa Egilisi katoliki Sãnti-i-na,

Mi hũyãa-ma wuɔ ɔnfafammantaamba kãyã ba-naa,

Wuɔ ɔmbabalma ka yaŋ,

Wuɔ bikuomba ka hel cĩncuɔŋa-na

a da cicẽlma maŋ siɛ ji tĩ dede.

I Tieŋ nuɔ, nuɔnei ninsoŋ-kerre-i

Mi hũyãa-ma naŋ maama-na. Katolikibaa-baŋ hãalãayã-yiɛ baa mamaŋ hiere mi hũyãa-ma hĩŋ. Naŋ fere-i ŋ waan-ma wuɔ ŋ siɛ gbãa pira ŋ fere, aa ŋ siɛ bi gbãa pira miɛŋo-i.

Itienj nuɔ, mi haa mi nanga niɛ

Mi haa mi nanga-i niɛ wuɔ da mi saa har η nungu-i ηaa nin
waɔŋ-ma dumaɔ, η ka kãyã-miɛ aa ce η nelle ce mi
diisuurre. η sa waŋ weima aa ji bir baa huɔŋ-ãndaɔngu.

Nelnyulmuŋ-ãndaɔngu:

I Tienj nuɔ, η faa yaŋ bĩmbĩnni-i hiere aa tiraa buɔ-niɛ.

Dumaɔŋ-na, η maama dɔlnu-miɛ a yaŋ bĩmbĩnni-i hiere.

Naŋ nelnyulmu barguɔ-i-na, mi tĩenataamba maama
dɔlnu-miɛ ηaa mei fɛrɛŋ-maamaŋ dɔl-minj dumaɔ.

Diilonj-ãnjĩnamma cĩncieluo maama-i

-Ta η buol Diilonjo yaa u diei yoŋ aa η ta η dɔl-o η yaŋ
bĩmbĩnni-i hiere.

-Baa ta η bĩ Diilonjo yerre-i ãnsɔsɔmma-na.

-Yaŋ Diilonj-yiingu ce u kũngu.

-Ta η dii η to-i baa η nyu-i ba nungu-i.

-Baa ko neliɛŋo.

-Baa ce fuocesĩnni.

-Baa cuo.

-Baa kar coima, baa bi tãalãa η haa neliɛŋ-na.

-Baa dii fuocesĩnniŋ-maama η huɔŋga-na.

-Baa hiel η yufelle-i molon bĩŋkũŋ-nu.

Mariya, Diilonj nyu nuɔ, cãrã η biɛŋo-i Yesu-i η hã-ye!

Mi niyatienj nuɔ, ta η niya-miɛ nyungo-i-na!

† Tuonjo baa Biɛŋo baa Yalle-Sãnti yerre-na.

Dānambāaŋ-jaalungu

† Tuoŋo baa Bieŋo baa Yalle-Sānti yerre-na.

♦ Baba, nyuŋgo ku bāaŋgu tīe, mi jaal-ni aa ce-ni kasi saa da-ni ku maama-na. Ŋ cie baa-mi cor, ŋ saa nanna-mie hã mi bigāarāŋo-i.

I To nuɔni maŋ dii dɔrɔ-i-na...

Mi jaal-ni Mariya...

Mi tūnuŋ Diiloŋo maŋ Weimantieŋo, baa mi huraan namaaŋo-i wuo mi cie āmbabalma-i bɔi: mi jɔguoŋ babalaa, aa waŋ babalaa, aa ce babalaa. Mi cālāa, mi cālāa, mi cālāa ninsoŋo. Ku'i cie mi cārā Mariya-Sānti baa dɔrpɔpuɔrbiemba-i baa Sāntibaa-ba-i hiere baa mi huraan namaaŋo-i wuo na cārā mi Tieŋo-i Diiloŋo-i na hã-mi.

Jande āndaanŋu:

Baba, miŋ cie āmbabalma maŋ, ma jaŋ-mi. Mi saa nu ŋ nuŋgu-i, naŋ fafaanŋu temma sī. Kāyā-mie baa ŋ hɔhĩnaŋga-i. Mi taara da mi ce mi fere kpāncōlgũo mi āmbabalma maama-na ku yaa mi sie tiraa tir ma temma.

I Koŋkortieŋo-i Yesu-i:

Kāyā Diiloŋ-dũŋ-baamba-i, baa i to-i Papu-i, baa mɔnsōnyer, baa perbaa-ba-i, baa i fāamaambaa-ba-i, baa i huraamba-i, baa i jēnaamba-i hiere. Kāyā-bei hiere halle baa i bigāarāmba-i. Baa yaŋ weima da-ba. Fē nawalaamba hɔmmu-i baa sūntaamba-i hiere. Āmbabalmanciraamba maŋ sa suyaan-niŋ, ce ba suɔ-ni aa nanna ba ciluo-i. Ce hujarre

bamaŋ cieŋ sũlma-i kuon-nelle-na. Hã-ba muntĩenammu ŋ caaŋgu-na.

Mi cãrã-kuo ŋ wulaa; Ŋ Biẽŋo-i Itieŋo-i Yesu-Kirsa yerre-na.
Ma ciɛ

Dɔrpɔpuɔrbiloŋo jaaluŋgu-i:

→ Itieŋo pɔpuɔrbiloŋo juo ji waŋ ba Maari-i wuo u ka ce Diilonɔ nyu.

➤ *Kusũŋgu yieraaya-yuo Diilonɔ-Yalle barguo-i-na.*

◆ *Mi jaal-ni Mariya...*

→ Muɔmi cãa Itieŋo yaa-i.

➤ *Uŋ waanɔ-ma dumaa, u yaŋ ma ce-miɛ dumɛi.*

◆ *Mi jaal-ni Mariya...*

→ Diilonɔ-Biẽŋo juo nelbilonɔ temma.

➤ *A ji tĩɛna baa-ye.*

◆ *Mi jaal-ni Mariya...*

→ Mariya-Sãnti, Diilonɔ nyu nuɔ, cãrã Diilonɔo-i ŋ hã-ye.

➤ *I ce ŋaa Yesu-Kirsaŋ pãa nuŋgu-i wuo i ce dumaa.*

Yaan i cãrã Diilonɔo-i:

Diilonɔ nuɔ, i Tieŋ nuɔ, miɛ maŋ suyaa dɔrpɔpuɔrbiloŋo ãndaanɔgu-na wuo Yesu-Kirsa juo ji hoŋ nelbilonɔ tamma, fẽ i hoɔmmu-i. Jande, ne Yesu mulĩɛma-i baa u kuliŋgu-i daanɔgu-na aa ŋ sire-yiɛ i waa i fɛrɛŋ nuɔ hoɔfɛlle-na.

Ce-ma Itieŋo-i Yesu-Kirsa yerre-na.

Mariya-Sānti jaalungu:

Diilonɔ nyu nuɔ, i cĩɔ nuɔnei nuɔ-i, baa nanna-yiɛ. Diilonɔ-nelle tienɔ nuɔ, ta ɲ hiel i yunni-i weima-na yinni maɲ joɲ.

➔ ✝ Tuonɔ baa Biɛnɔ baa Yalle-Sānti yerre ce bɔi!

➤ *Ŋaa diɲ ɲa naa waa bɔi duma yĩnaa-i-na, di ce dumei fiefie-i-na, yinni maɲ joɲ, di siɛ ji tĩ dede. Ma ciɛ*

Díilo tuɔ síɛ na cārāmma-í

